

Ruth Schmitt  
En Owend im Dezember

Im Advent dehaam in unsrer Kich  
hummer gesotz ze dritt um de Disch.  
Owend wars, des Kerzche hot gebrennt.  
Alles war friedlich - Hund unn Katz hunn gepennt.

Unser Babba war eifrig bemieht,  
dass er en Weihnachtsliedertext zesammekriet.  
"Ehr Kinner, ich glaab, es kann jetz gelinge,  
dass mer 'O Tannebaum' mitenanner singe!"

Mei Brüderche voller Begeisterung singt,  
dass dorch des ganze Haus es klingt:  
"Stille Nacht, heilig Nacht,  
alles schläft, einsam wacht

nur das traut hochheilige Paar -  
holt den Knaben am lockiche Haar!"  
Bei dem Satz hört des Karlche uff,  
leet soi zwaa Händ fescht uff de Kopp owwe druff:

er hot sich nämlich ausgemolt,  
jetzt kimmt e Hand, die fort ihn holt.  
De Babba seet: "Bub, das vestehste vekehrt."  
Hot de Wortlaut ihm genauere erklärt.

Mit uns ze singe, machte unserm Babba Freid.  
Manche Geschicht er hatte aach for uns bereit,  
konnt vezähle ganz wunnerbar,  
wie 1921 de Rhoi total zugefrore war!

Unn dass er mit dem Rad ganz ohne Gefahr  
bei eisiche Temperature, bei eme Himmel klar  
enüwwergeradelt is uff die anner Seit.  
"Dort hatt mer Glühwoi unn Werschtcher bereit',

mer hot sich gelabt unn aach gestärkt -  
dass de Rhoi dief unn braat is, hot mer net gemerkt.  
Knochehart war alles gefror -  
in hunnert Johr kimmt so ebbes nor aamol vor!

Es gab kaa aanzig brüchig Stell.  
Mitte uffem Rhoi speelte sogar e Mussigkapell ...  
Es war schun e Sensation, ehr Kinn,  
e Erlebnis for mich, en echte Gewinn!

En Mordsbetrieb war uffem Vatter Rhoi,  
des Wasser war Eis unn gliehend haaß de Woi.  
Uff den Eiswinter kam en Summer, der errsinnig haaß,  
bei de Arwet floss in Ströme de Schwaaß!

Es hot kaan aanziche Trobbe gereent,  
alle Leit hunn unner dere Hitz gestehnt.  
Die Kornernt hatte e schlecht Gedeih -  
dodefor gabs im Herbst en ausgezeichnete Woi!

Awwer die Kadoffele, ehr Kinner, das war bees -  
die wurde fascht all vun de Meis gefress.  
For des Viehzeich war des Furer knapp,  
mit dem Vorrat gings do schnell bergab.

Sparsam musst mer schalte unn walte,  
um die magere Monate dorchzehalte.  
Vederrt war alles in dere grelle Sunn,  
mer hot kaan griene Halm meh gefunn.

Manch aaner war am Enn vun de Kraft,  
hot sei Kuh unn sei Gääbje abgeschafft.  
Stellt eich das doch nor emol vor:  
e wichtig Lebensgrundlag ging velor!"

Die Geschicht hot uff mich diefe Indruck gemacht -  
sie war Wirklichkeit unn net ausgedacht.  
No dem Vezehle vun friehere Zeite  
wollte mer e Rund uffem Schockelgaul reite

Unser Abbelschimmel war stark unn groß,  
mit dem machte mer ordentlich ebbes los.  
Mein Bruder war knapp üwwer vier unn noch klaa,  
setzte sich uff die ausgestreckte Vorrerbaa

vum Gaul, unn ich, die niemols vestockt,  
hatt mich uff die hinausragende Hinnerbaa gehockt.  
Uff de lange Schaukelkufe  
gings los mit "Heißa-Hussassa"-Rufe.

Mer schaukelte wie wild hee unn her -  
de Winterowend so ze vebringe, war net schwer.  
An des Haus fesselte uns die dunkel Zeit.  
Gottseidank: mer ware jo zu zweit,

konnte uns in infallsreiche Spiele sterze,  
des Warte uff des Chrischtkind dodemit vekerze.  
Hatte mer satt im Haus die Sache,  
wollte en Abstecher in de Hof enaus mache,

seet de Babba: "Bleibt do bei dem Gaul,  
draus steht aaner, der hot e Brotworscht im Maul!"  
Mer kaame zerick schnell wie de Wind -  
die Sprich die hot mer geglaabt als Kind.

De Advent war schee, mit Vezehle, Speele unn Singe -  
des Gutsjerbacke vor alle Dinge  
war for uns Kinner e Besonnerheit.  
Das geheerte dezu in de Vorweihnachtszeit!

Bis de Heilig Owend kam,  
bliewe mer geduldig unn brav dehaam.  
So wars in unsere Kinnerdaache -  
iwwer Langeweile konnte mir uns net beklaache!